



t Zel joe net zo vergoan. Wat dou je as je van plan binnen om -ik nuim mor wat- ien haarstvekaanzie n dagje naar t Aailaand te goan? Te hemmen gain zin om van kroug noar restaurant noar café te goan en dat weer noar boot weerom, dus je perbaaiern t zó te roaken dat je net n schiere dag trevven.

Zó makkelk is dat nog nait, ook nait as mainste doagen van haarstvekaanzie mooi weer veur tied van t joar haren. Dat wait je immers noatied pas en din is t te loat. Wat dou je as je n dag ófhankelk wezen mouten van t weer, ie heuren noar de berichten. Wat zol KNMI der van zegen? En Pelleboer vanzulf, wat kiek het dij der op?

Slim onzekere lu willen ook nog waiten wat Hans de Jong der van zegt, want dij wait n bult van t weer ien Vraislaand en aailanden binnen (tegenworreg) zowat apmoal van Hans Wiegel, is t nait zo?

Kort en goud: hou geleerd of ze wezen maggen, ons heren meteorologen, wie vertraauwen heur mor naauw as ze t over t weer van mórgenvro hemmen. En ik geef zulf mor n luk beetje veur heur verwachters van t weer van óvermórgen as t weer glaas op 'bestendig' staat. Aans loof ik liekdoorns van mien achternicht nog laiver, bie wieze van spreken din.

Ik kom doar op ien verband mit hail aans wat. As je wat beleven willen, mout je n Grunneger boukje schrijven en veuraal n nij woordenboukje: dat

is nijs en din heb je n bult aanloop van journalisten en n dag noatied belt elk en ain joe weer ais op, ze hemmen joe op petret zain ien kraant.

Ook aal vertel je aan 100 journalisten 100 moal t aigenste verhoal, as zai der n verhoal van moaken is t 99 keer n aander dij aan t woord is: journalisten binnen net mensen en dat moakt kraant leesbaar.

Aine verslaggever het hier meer oog veur, aander vaalt aans wat op.

Ien t veurwoord van t nije Grunneger buuswoordenboukje haar ik schreven, dat ik -bievubeld- nait extroa veul stadje woorden opnomen haar: ik wis hou waineg t Stadjeders nog gesproken wordt, doar zai je of heur je zowat nooit wat over.

Dát was nij veur ain van n blad oet Stad en wat ien t veurwoord n opmaarken tussen hoakjes was, wer hier nijs veur t veurblad.

Bie t votgoan vroug e nog (t was n goie journalist, dij vroagen t belangriekste op t leste der eefkes bie tussendeur), of t ien Ommelanden ook zo'n boude was mit t Grunnegers. Nou, dat is gain kwestie: doar is belangstellen leste joar of wat zó tounomen, doar is t nait te vergelieken mit t Stad-Grunnegers. Of t toukomst het, zel tied wel leren...

t Het touvaal west, mor n dikke week loader vertelde n zeergeleerde man oet Broabant dat wie hier en overaal wel opholden kinnen mit aandacht te schenken aan ons aigen taal: is gain zaalf aan te strieken en vrouger was lokomotief ook aal nait tegen te holden. t Zel nog n zetje duren, mor din is t doen mit t Grunnegers.

t Het gain touvaal west, dou weer n week loater n aander man ien n aander kraant schreef dat t Grunnegers gain toukomst haar: ze zeden nou aal hoast apmoal "ik gaai" en nait "ik goa", en "wie dudden" en nait "wie doun". Conclusie was hail helder: ook al geef je honderd woordenbouken oet, t

is doan mit t Grunnegers over n pooske.

Baaide manlu kinnen hail best geliek hemmen. As ain zegt, dat t apmoal wat touvalen zel, want veur honderd joar klougen ze ook aal over t oetstarven van dialecten, din kin dij ook wel geliek hebben. Wèl zel t zegen? Ik ien aals geval nait. t Grunnegers wordt heard aans t wordt ien n bult opzichten áál meer Hollands. Ik denk dat t nog nooit zó heard aan t veranderen west het as vandoag aan dag en der is gain holden of opmuiten aan, zo liekt kin allinneg mor vanzulf overgoan.

"Ik gaai" is Grunnegers van distied en "wie dudden" ook: doar is mor ain schuld aan (as ik dat woord bruken mag), en dat binnen dij lu dij vonden dat heur kiender pas Grunnegers proaten moggen dou ze n bult op stroat touholden gingen. Dat is gain verwiet, mor slichtweg zegen hou t kómmen is.

Meschain zet dij ontwikkeldeur, meschain ook nait. Welke toalmeteoroloog duurt n veurspellen geven veur over vatteg, vieftig joar? Zólaank wordt ter minstens nog Grunnegers proat dat slim liekt op dat van de oldste mensen van tegenworreg en dou der din rusteg mor n rommeltje joaren bie ook.

Wèl kin op zo'n termien taal veurspellen, as t KNMI en Pelleboer en Hans de Jong t al nait ains binnen over t weer van overmórgen? Ik stel veur dat we mor gewoon weer aan t waark goan en rusteg ófwachten wat weer of t worden zel.

SIEMON REKER